

Eldin Milak,
fulbrightovac s bh. adresom

Titule se uvijek zasluže post hoc

Uspjehe koje je postigao tokom osnovnog i srednjeg obrazovanja Milak nije želio prekinuti na fakultetu. Nastavio je biti najbolji i na međunarodnom Burch univerzitetu, odakle ga je put odveo u daleku Ameriku. Dobio je 2017. Fulbrightovu stipendiju, jednu od najpoznatijih međunarodnih stipendija za studij u SAD-u. Nakon devet mjeseci istraživanja narodnih identiteta, Milak se vratio u BiH i nastavio raditi kao asistent na nekoliko predmeta na Burchu. Ciljeva ispred njega je mnogo. Jedan je odlazak na doktorat u Koreju...

Piše: **ELMINA MUHIĆ**

Dvadesetšestogodišnji Eldin Milak iz Sarajeva jedan je od onih mladića čiji se trud isplatio i bio prepoznat u dalekoj Americi. Najprije je bio učenik generacije u Srednjoj tekstilnoj školi u Sarajevu, zatim najbolji na Burch univerzitetu pa onda i dobitnik prestižne Fulbrightove stipendije.

Samog sebe on teško može da opiše. Kaže da ima mnogo društvenih uloga. Na poslu je asistent na historijskoj lingvistici, naprednom

čitanju, podučavanju jezičkih vještina, engleskoj književnosti i engleskom jeziku za posebne svrhe. Tu je, govori, mnogo ozbiljniji i zreliji. U privatnom životu je vrlo opušten, kreativan, voli putovati i učiti nove stvari. U nekim stvarima, priznaje nam, i dalje je ostao dijete.

Sve je povezano

“Završio sam, mnogi se začude, Srednju tekstilnu školu u Sarajevu. Tu sam završio smjer modelar-konstruktor, pa sam i radio kao dizajner neko vrijeme dok nisam završio kao student na Odsjeku engleskog jezika na



Milak:
Stipendija i titula
fulbrightovca otvaraju
mnoga vrata Foto:
DAMIR ČUMUROVIĆ



Burch univerzitetu. U srednjoj školi sam bio učenik generacije. Bilo je izuzetno zabavno, tako da nisam ni osjetio taj neki akademski napor. Bilo je zabavno i dosta kreativno raditi. S obzirom na to da sam bio učenik generacije, dobio sam stipendiju za studiranje na Burchu. Danas sam asistent na Odsjeku za engleski jezik i književnost, kao i asistent na drugih pet predmeta, različitih po prirodi, ali se većina fokusira na lingvistikom kao glavni studij. Sociolingvistika je, u biti, moja specijalizacija", priča Milak.

Na pitanje kako je uspio povezati toliko različita polja svog rada, počevši od dizajna pa do engleskog jezika, sagovornik *Dana* objašnjava kako je njegova inspiracija još od osnovne škole bio Leonardo da Vinci te njegov moto.

"Njegov moto u životu je bio *Sve je povezano*. I koliko god se meni ili možda drugima ta polja činila, onako, odvojena, ja sam prepoznao neke stvari u dizajnu koje sam kasnije našao u engleskom jeziku, a onda sam ih pronašao u lingvistici. U biti smatram da ljudi obnašaju iste fenomene ili rade iste stvari, samo na različite načine. Tako zaista ne mislim da polje u kojem sam igra ulogu u tome šta izučavam, jer svi mi izučavamo istu stvar, samo iz različitih aspekata", napominje Milak.

Nakon što je 2014. diplomirao na anglistici, odlučio je i da studij nastavi pa je 2016. magistrirao i ponovo bio student sa najboljim prosjekom. I prije nego što je magistrirao, bio je siguran u svoj dobar rezultat. I već 2015. počeo je prikupljati informacije za svoj sljedeći korak. A to je, ispostavilo se kasnije, bila prijava za Fulbrightovu stipendiju. Za nju je, pojašnjava nam Milak, konkurisao sasvim slučajno.

"Na fakultetu je jednog dana bio postavljen štand Fulbrighta i uzeo sam podatke koordinatorice za

program. Nakon nekoliko sedmica razmišljanja odlučio sam da pokušam i otišao sam na prvi sastanak u American Council, gdje sam dobio upute za prijavu. Sam proces prijave je počeo 2015. i trajao je gotovo godinu. Proces uključuje mnogo dokumentacije, kao i polaganje TOEFL testa te intervju u Ambasadi. Kroz svaki korak sam prolazio iskreno misleći da ću dobiti odbijenicu", prisjeća se on.

Umjesto odbijenice - Amerika

Ali, umjesto odbijenice, u decembru 2016. saznao je da je jedan od finalista i da mora sačekati maj 2017. kako bi dobio odgovor - da li je dobitnik stipendije ili ne.

"To je bio jedan od najdužih perioda u mom životu, a kada mi je konačno javljeno da sam osvojio stipendiju, nisam mogao vjerovati. Vijest mi je javila koordinatorica iz američke ambasade i to na pauzi između predavanja, pa je bilo jako teško vratiti se u učionicu i nastaviti predavati. Međutim, iskreno govoreći, nisam u potpunosti shvatio da sam dobitnik stipendije sve dok nije došlo vrijeme da uđem u avion i krenem za Ameriku", govori Milak.

Fulbrightova stipendija dodjeljuje se svake godine po kategorijama. U kategoriji master-student/istraživač bio je samo jedan dobitnik i taj jedan bio je on. Devet mjeseci proveo je u Americi gdje je istraživao narodne identitete.

"Fulbrightovoj stipendiji me je, zapravo, privlačilo to istraživanje koje sam najprije započeo u BiH, kako se Bosanci i Hercegovci identifikiraju u smislu narodnog identiteta. Rezultati su bili dosta zanimljivi jer sam otkrio da mnogi Bosanci i Hercegovci zapravo sebe ne smatraju Bosancima i Hercegovcima", priča Milak.

Čvrsto vjeruje: Stvari koje žarko želimo će se i ostvariti

Foto: JULIUS CONSTANTINE MOTAL

Koliko god da je sam vrednovao svoje vještine i znao u čemu je dobar, a u čemu nije, Fulbright je, priča nam, to još i potvrdio



Sve je povezano: Inspiracija iz djetinjstva bio je moto Leonarda da Vincija

Trenutno apliciram za doktorat u Koreji koji će se, nadam se, i ostvariti. Ali, ukoliko ne, imam još nekoliko planova za doktorat u drugim zemljama

Njegova mentorica Eileen Fitzpatrick je šefica Odsjeka za lingvistiku na Montclair State Univerzitetu, gdje je radio osnovni dio istraživanja.

"Bilo mi je izuzetno zadovoljstvo raditi s njom i njeni komentari završne prezentacije mog projekta su bili jako pozitivni. Razlog zašto me je profesorica odabrala, jer u Fulbright programu mentor bira studenta, jeste to što joj se jako sviđjelo moje istraživanje u BiH, tako da smo odlično saradivali od samog početka. Tokom mog boravka bio sam u kontaktu sa mnogo profesora i svi su bili jako zainteresovani za moje istraživanje, kao i za sam sistem obrazovanja u BiH", govori Milak.

Tako je dobio priliku i da svoje istraživanje predstavi u Americi. Tamo je, kaže, istraživao američki identitet, naročito među manjinskim skupinama.

"Pa sam istraživao, naprimjer, među crncima. Istraživao sam kako oni percipiraju svoj identitet u odnosu na američki", pojašnjava Milak.

Osim što je svojim akademskim radom predstavio BiH, on je zemlju odakle dolazi predstavio i na Studentskoj konferenciji o pitanjima SAD-a na West Point akademiji, zatim u NASA centru u Houstonu, na UN-ovoj konferenciji u New Yorku, kao i na godišnjoj Fulbright večeri u New Yorku, gdje je bio jedan od tri glavna govornika koji su predstavljali nagrade za tu večer.

Upornost se isplatila

Upornost je ono što je Eldina Milaka učinilo drugačijim od ostalih koji su zatražili ovu stipendiju. Za to, priča nam Milak, treba imati jake živce, jer izbor od prijave traje osam ili devet mjeseci.

"Vi, zapravo, ne znate da li ste je dobili do tri mjeseca prije nego što trebate putovati. Tako da kad vas, ono, pitaju šta ćete raditi iduće godine, ja nemam pojma jer ne znam hoću li biti ovdje ili ću biti u Americi. Trebate, dakle, biti jako uporni i trebate tačno znati šta želite od tog iskustva", kaže Milak.

Odbor će, njegovu je iskustvo, primijetiti ako onaj ko traži stipendiju, želi da otkrije samog sebe.

"Vi možete otići da otkrijete sami sebe, ali u biti trebate ići sa



Govornik: Istraživao američki identitet, naročito među manjinskim skupinama

već izgrađenim karakterom da biste mogli opstati u potpuno drugoj kulturi. Ideja je da vi prezentujete svoju državu, a ne da se potpuno asimilirate u državu u koju dolazite. Tako sam morao dokazati i da sam sposoban da živim u potpuno drugoj kulturi na tako dug period i da uspješno predstavljam svoju zemlju u tom periodu”, dodaje Milak.

I opet: da će dobiti Fulbrighta i na devet mjeseci svoj dom zamijeniti Amerikom, Eldin Milak nije očekivao, ali se definitivno nadao.

“Jedna od ideja u koju čvrsto vjerujem jeste da će se stvari koje žarko želim i ostvariti. Uradio sam sve što sam mogao i onda sam samo sjeo i rekao da ukoliko ne dobijem stipendiju, bar znam da sam ja dao sve od sebe, ali da obično kada dam sve od sebe, onda i dobijem to što želim”, priča Milak.

Devet mjeseci istraživanja i titula fulbrightovca, a oni na akademiji imaju poseban status, za Milaka i njegovu karijeru znače mnogo.

“Fulbrigtova stipendija sama, kao i titula fulbrightovca priznati su u svijetu i otvaraju mnoga vrata što se tiče zaposlenja i studija, kao i mnoge konekcije. U našoj zemlji sam se povezao sa mnogim ljudima od umjetnika, pjesnika, pa do profesora. A na nekom ličnom nivou, Fulbright je bio jednostavno godina u kojoj sam

se potpuno razvio kao osoba, kao profesionalac, upoznao jednu drugu kulturu i spoznao samog sebe malo bolje. Iskustio sam neke stvari za koje nisam mislio da ću ih ikada iskustiti. Našao sam se prvi put u situacijama gdje sam se morao nekako snaći, što nisam nikada morao ovdje i tako dalje. Zato je na ličnom nivou to bila godina velike promjene”, priča Milak.

New York, Texas, NASA

Ipak, to što je fulbrightovac najviše je utjecalo na njegovo samopouzdanje. Koliko god da je sam



Sjećanja: Prijatelji za cijeli život, New York, Texas, NASA

Proces uključuje mnogo dokumentacije, kao i polaganje TOEFL testa i intervju u Ambasadi. Kroz svaki korak sam prolazio iskreno misleći da ću dobiti odbijenicu



Čekanje: Nikad duži period u životu

Foto: JULIUS CONSTANTINE MOTAL



Posao: Asistent na Odsjeku za engleski jezik, književnost i pet drugih predmeta

vrednovao svoje vještine i znao u čemu je dobar, a u čemu nije, Fulbright je, priča nam, to još i potvrdio.

“To je ono što ja vidim i znam. A drugi kada vide titulu Fulbright, znaju da sam se pokazao u svom polju, da sam donekle dobar. Moji studenti definitivno vrednuju tu stipendiju. Sami su zainteresovani da jednog dana postanu akademskog napora, stvar sa titulama je, ja iskreno mislim, takva da se uvijek zasluže samo post hoc, odnosno nakon što mi je dodijeljena, ja ću je zaslužiti. Zato će se to da li sam zaslužio da zaista budem fulbrightovac pokazati nekada u mojoj budućnosti. Ja se nadam da ću opravdati tu titulu”, kaže Milak.

Iz tog perioda najviše će se sjećati mjesta koja je obišao - New York i Texas, zatim laboratorije NASA, te prijatelja koje će, kaže, imati za cijeli život.

Nizati uspjehe i biti najbolji Eldin Milak će nastaviti. Njegov sljedeći cilj je doktorat, također negdje daleko.

“Trenutno apliciram za doktorat u Koreji, što će se, nadam se, i ostvariti. Ali, ukoliko ne, imam još nekoliko planova za doktorat u drugim zemljama. U svakom slučaju ću nastaviti u polju lingvistike, primarne i sociolingvistike. Što se tiče tematike doktorske disertacije, to ću još razviti s budućim mentorom, ali bih definitivno volio ostati u polju istraživanja ljudi, njihovog jezičkog ponašanja i kako to utiče na formiranje njihovog identiteta. Da li će to biti Koreja ili neka druga zemlja, ostaje da se vidi...”, sa osmijehom govori Milak i dodaje da je Bosna i Hercegovina uvijek njegov dom i ono mjesto kojemu će se uvijek vraćati. ■